



Il chantun da Glaruna

«Chattà» visita oz il chantun Glaruna che tanscha da la Planira da la Linth fin al Tödi.

9



Seria da referats en il Naturama

En il rom dal giubileum dal PNS ha cumenzà ina seria da referats en il Naturama.

11

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuiru, tel. 081 920 07 10, fax 081 920 07 15

Cuors da Fundaziun de Planta sun stos ün success

■ (anr/mfo) Il bilantsch general cha Mario Pult, collavatur regiunal da la Lia Rumanotscha ed organisatur dals cuors intensivs da rumauntsch a Samedan, po trer, es positiv. El deplorascha però cha'ls cuors, previs pustüt per persunas indigenas, vegnan frequentos poch bain. Üna tschinquantina da partecipantas e partecipants ha fat adöver quist an da la spierta dals cuors intensivs da rumauntsch a Samedan. Quels vegnan organisos daspö püs ans da la Lia Rumanotscha per incumbenza da la

Fundaziun de Planta ed haun fat plaschair a pitschen e grand. «L'atmosfera chi regnaiva düraunt quist cuors da rumauntsch es steda fich buna ed il plaschair dad imprendder la lingua es sto grand scu adüna», tira Mario Pult ün prüm bilantsch. Ch'unic il fat cha l'ocasiun da pudair discuorrer rumauntsch eir dadour las staunzas da scoula mauncha saja da deplorer, cuntinua'l. Sper ils cuors da lingua es gnieu spüert eir ün program accompagnant.

> PAGINA 11

«La midada ha motivs logistics»

Cuors romontsch sursilvan naven da l'auter onn en claustra a Glion

DA HANS HUONDER / ANR

■ Dapi igl onn 1982 ha il Cuors romontsch sursilvan dalla Fundaziun Retoromana Pader Flurin Maissen liug a Laax. Uonn ei quei denton per la davosa ga. Naven digl onn vegnent cattan ils responsabels, magisters e partecipants in niev suttegt ella claustra a Glion. Nus mein buca bugen naven da Laax, mo las cundiziuns da plaz sforzan nus da far quei pass», di Francestg Friberg da Danis, il menader general dil cuors. Il center dil cuors a Laax sesanfla dapi 32 onns ella Casa Caltgera. Essend ch'il diember da partecipantas e partecipants ei carschius marcantamein dapi lu sto la scolaziun succeder en ulteriuras localitads ordeifer la casa. «Sut circumstanzias savessen entgens partecipants dil cuors insumma buca separticipar ni mo paucas gadas e quei ei buc il senn da quella purschida», puntuescha Francestg Friberg. La nova dimora dil cuors ei la claustra a Glion. Cheu sa la Fundaziun Retoromana Pader Flurin Maissen far diever da lo-



Il president communal da Glion Aurelio Casanova, sora Madlen Büttler dalla claustra da Glion, Francestg Friberg dil Cuors romontsch sursilvan e Curdin Tuor dil Center da formaziun Surselva (da sen.) selegnan dalla collaboraziun futura.

FOTO H. HUONDER

calitads d'instrucziun dil Center da formaziun Surselva, respectivamein pil diever general e per star sur notg dalla claustra. La vischnaunca da Glion sustegn il cuors cun ina contribu-

ziun annuala da 10 000 francs. «Nus havein plascher ch'il Cuors romontsch sursilvan vegn a Glion. Per noscha vischnaunca ei il romontsch da gronda impurtonza», puntue-

scha il president communal Aurelio Casanova. Tenor Francestg Friberg porscha Glion las cundiziuns idealas pil cuors.

> PAGINA 3



Fluras raccoltadas e magasinadas da l'erborista Raselli a Le Prese. MAD

Tge manaschi gudogna quest onn il Prix Montagne?

■ (anr/vi) Per la quarta giada premieschan las duas organizaziuns da muntogna svizas in manaschi innovativ u curaschus. Da ventg annunzias ha la giuria nominà sis projects per il Prix Montagne 2014. Tgenin che survegn il premi da 40 000 francs vegn or ils 19 d'avust a Berna. Tranter ils nominads sa chattan gist trais manaschis grischuns: la Clinica alpina a Scuol, il bain «La Sorts» a Filisur e l'erborista Raselli a Le Prese.

Per insumma vegnir nominà

na basti betg ch'in manaschi saja be innovativ u curaschus. Il manaschi sto esser sa cumprovà economicamain dapi almain trais onns. El sto avair stgaffi piazzas da lavur u contribuir a la varietad economica en la regiun da muntogna. Il manaschi duai avair caracter da model ed esser in bun exempel per auters.

Il premi vegn surdà da las duas organizaziuns Agid svizzer per la muntogna e da la Gruppa svizra per las regiuns da muntogna.

> PAGINA 2

Patrimoni mundial dalla Arena tectonica Sardona

■ (mc) Ei sto buc adina esser Mallorca, Dubai ni las Maldivas. Era ella proxima vischinonza dat ei bellezias che valan la peina dad esser discuvretgas. Ina da quellas attracziuns zuppadas ei l'Arena tectonica Sardona che attraia adina dapli hospes ella regiun che cumpeglia il Grischun, Glaruna e S. Gagl. Dapi dus onns dat ei era excursiuns guidadas da

GeoGuids en quella regiun admirabla. Sin quellas excursiuns san ins veser live co las muntognas ein seformadas ord differentas stresas da differenta vegliadetgna. La Quotidiana dad oz dat en plaid e maletg in'impreschiun dallas bellezias naturalas che l'Arena tectonica Sardona ensiara.

> PAGINA 5

A pei da Tusaun a Chiavenna

■ (anr/sr) La «Via Spluga» ei inasenda da viandar culturhistorica che dat access alla historia dalla regiun entuorn il Pass dil Spligia, leu nua ch'ils destins dils Romontschs, Gualsers e Lombards s'uneschan dapi il temps medieval. Il viadi da Tusaun sur il Pass dil Spligia a Chiavenna meina sur ina dallas rutas da commerci las pli impurtontas

d'ina gada. La baselgia da Ziran, la Viamala, la Puntcrap e bia auter envidan da far in paus e guder. Dall'autra vart dil Spligia fa la senda tras la greppa dil Cardinello impressiun a beinenqual viandont che ei lu bi leds d'arrivar ad Isola e suenter in'ulteriura etappa el bi vitg da Chiavenna.

> PAGINA 8



La ruosna da s. Martin – in bural sillas imposantas muntognas glarunesas. MAD



Aschia menava la via veglia dil Spligia pli baul giu dil pass.

FOTO S. ROTHMUND



Servetsch d'abunents e da distribuiziun: tel. 0844 226 226 mail: abo@somedia.ch